

Poli'a Galesia Vahe'mokizmi Avonkrezmi'nea Naneke

1 ¹Nagra Poli'na aposol ne'mo'na, ama eri'zana mago'a vahe'mo hunantege, mago'a naga'mo'za erio hazagena e'norue. Hianagi Anumza Nafatimo Jisas Kraisi fri'nefinti azeri otinemo'ene, ²maka nagrane mni'naza nafuhezanena, Galesia mani'naza mono nagamotarega musenkea atreneramantone.

³Anumza Nafatimofone Ranti Jisas Kraisi asunkuzamo'ene rimpa fruzamo'a tamagrane mesie. ⁴Jisasi asimu'a atreno kumitia atterante'ne. E'inama hu'neana Anumza Nafatimofa avesi avaririno, mopafima amama meni mni'nona kefo avu'avazampinti tahokeno tazahunaku anara hu'ne. ⁵Ana hu'negu Anumzamo ra agia, Agra'a eri vava hugahie! Tamage.

Magoke knare musenkemofa naneke

⁶Nagra antri hue, Anumzamo'a Jisasi asunkuzanteti tamagi hu'nea nagamota netretma, ruzahu musenkemofa amage nentaze. ⁷Hanki ru knare musenkea omnene, mago'amo'za tmazeri savri hu'za Jisas Kraisi knare musenkea erisavri hunaku nehaze. ⁸Hianagi tagraneno, monafinti ankeri vahe'mo, ko'ma tamasmi'nona knare musenke atre'za, ru kema tmasamisazana, kasusifi manigahaze! ⁹Ko'ma tmasmi'nona ke menina mago'ene neramasamue, Ko'ma knare musenkema huama hunketa antahi'naza kemofoma ha'ma rente kazigatima kema hanimo'a, kasusifi manigahie!

¹⁰Na'ankure nagrama e'inagama nehuana, vahe'mo'za antahi so'e hunantege, Anumzamo antahi so'e hunantenogu nehufi? Hifi nagrama mraguzamanetuaana vahe'mo'za antahi muse hunantehogupi? Nagrama vahe'mo'za antahi muse hunante'nazegu'ma nehanuna, Nagra Kraisi kazokzo eri'za vahera omni'noe.

Poli'a eri'zama'agu azeri hanaveti ke hu'nea naneke

¹¹Na'ankure nenafugata nagri'ma navesiana, knare musenkema huama nehuana, vahe'mofo antahintahireti hunoramie huta antahi ama hnazegu

nehue. ¹²Na'ankure ama ana kea vahepinti e'orina, vahe'mo'za rempia huonami'naze. Hianagi oku'a frakinea kea Jisasi eriamu huno nami'ne.

¹³Na'ankure korapama Jiu vahe'mota avu'avaza nehua knafina, Anumzamofu avu'ava nehue nehu'na, mono nagama nezmaheha, zmazeri havizama hu'noana tamagra ko antahi'naze. (Apo 8:3) ¹⁴Nagra tusi hanaveti'na tagehe'mokizmi zamuzmara amage'nentogeno, anama huazamo'a nagri navuma mni'naza, Jiu vahe'mokizmia zamuzmamofona zmagatere'noe. Nagra tusi hanavetina nagehemofu avu'avara avaririnoe. ¹⁵Hianagi nagra nenrera rimpafina forera osu'nogeno, korapa Anumzamofu Agra'a asunkuzanteti huhamprinantenemo muse hunanteno, ¹⁶Agra'a nemofona naveri hige'na, megi'a vahepina knare musenkea huama nehue. Mago vahe'mokizmia ame hu'na nagra zmantahi'onke'noe. ¹⁷Jerusale kumate nagra mareorina, ko'ma mni'naza aposol nagara ome ozmage'noe. Hianagi nagra Arabia kumate vute'na, ete mago'ene Damasakas kumate vu'noe. ¹⁸Ana hute'na, 3'a kafu evige'na, Jerusale kumate vu'na, Pita'ene kea ome nehu'na, 15ni'agna anante mni'noe. ¹⁹Hianagi mago'a mono nenafugizmia ozmage'noanki, Ramofu negna Jemisinke ke'noe. (Apo 9:26-30, 11:29-30)

²⁰Nagrama amama kreneramuana, Anumzamofu avufina tamage hu'na reramatga nosue. ²¹Ana hute'na Jerusale kumara atre'na Siriane, Silisia kaziga vu'noe. ²²Judia kazigama mono nagama Kraisimpi mni'namo'za, nagrira navufina onage'naze. ²³Hianagi tagrama tamentintima nehunkeno, nerahegeta agenke'a nentahuna ne'mo'a, amentintimofu kea huama nehie hu'za nagrikura hu'naze. ²⁴Na'ankure nagrite'ma fore'ma hu'neazankura, Anumzamofu agi erisaga hu'naze.

Poli'a Jerusale vuno aposol vahe'ene ke ome hu'nea naneke

(Apo 15)

2 ¹14ni'a kafuzge manite'na, Jerusale kumate Banavasi'ene ete mmerita nevuta, Taitusina avreta vu'no'e. ²E'inama hu'noana na'ankure oku'a fraki'nea nanekea, Anumzamofu nagri naveri hu'nea naneke megi'a vahepi huama hu'noa kea ome zmasami'noe. Menima e'nerua erizamo'ene, ko'ma eri'noa eri'zamo'a amnezanknara osinogu kva vahe zamagrike ome zamasami'noe. ³Hianagi Taitusi'a Griki ne'mo nagri'ene vano nehia neragi, kva vahe'mo'za mago zmarimpa hu'za, oku avufga tga huzankura mago kea osu'naze. ⁴Hianagi havige mono nerafu'za mono vahekna hu'za atrumahumpi enefre'za, Kraisi Jisasimpi fruhuta mni'nonazana tavre'za korapa avu'avazampi kinarerante'naku efre'naze. ⁵Hianagi tagra tamage knare musenkemo tamagrane mesiegu, zamagri kea antahiozamita kankamuna ozamunke'za, havige mono nerafu'za tagrikura ke hara hurante'naze. ⁶Hianagi ra zmagima eri'naza vahe'mokizmia, ra zmagima eri'nazo, ra zmagi e'ori'nazo nagra ana zankura nontahue.

Anumzamo'enena ra zmagigura nontahie. Ana zmagima me'nea vahe'mo'za mago kea nagri kerera osu'naze. ⁷Hianagi zamagrama ke'za antahizama hazana, Pitama zamufga tgahu Jiu vahete knare musenke ome huama hinogu hunte'neaza huno, nagrira zamufga tga osu'naza megia vahete knare musenkea huama huogu hunante'ne hu'za ke'za antahiza hu'naze. ⁸Na'ankure zmuftga tgahu Jiu vahempima Pitama aposol erizante huntogeno vu'nea Anumzamo, nagri'enena aposol erizana zmuftga tga osu megia vahepina eriogu hunante'ne. ⁹Anumzamo'ma asunkuzama'areti nami'nea eri'zana, Jemisima, Pitama, Jonima zamagra mono erizamofona hagaza zafa mani'ne'za ke'ama nehu'za, Banabasine nagri'enena megia vahepi eri'za omerisu'egu magoka hurantageta megia vahepina vu'no'e. Hagi Jiu vahete zmagra eri'zana erisageta, tagra megia vahepi eri'zana erigahu'e.

¹⁰Zamagra zamunte omane vahe zamaza huzankura antahizamihio hu'za hurante'naze. E'i ana eri'zana nagrira tusi'za huno navesisige'na erinaku nehua erizanku hu'naze.

Pita haviza higeno Poli'a kesuno azeri fatgo hu'nea naneke

¹¹Hianagi Pita'ma Antioku kumate ehnatige'na, haviza hu'nane hu'na avufi kesu'noe. ¹²Na'ankure Jemisima huzmante'nea vahe'mo'zama omenageno'a, Pita'a knare huno megia vahe'enena magopinti ne'zana netere hu'ne. Hianagi mago'a vahe'ma Jemisi'ma huzmantege'za neageno'a, Pita'a anamokizmia zamatrengo agragu umanine. Na'ankure zamufga tga hu'naza vaheku koro hu'no'e. ¹³Maka Jiu vahe'mo'za, anahukna hu'za krana zamuzma nehazageno, ana zamo'enena, Banabasina avazu hu'ne. ¹⁴Hianagi nagrama kogeno, knare musenkefi fatgo hu'za omnizagena, maka'mokizmi zamufi anage hu'na Pitana asmi'noe, kagra Jiu ne' mni'nenka, megia vahekna hunka nemaninka, Jiu vahekna hunka omnio. Nankna hunka megia vahe'mokizmia, Jiu vahe'moza nehazaza hiho hunka nehane?

Jisasi Kraisinte zamentinti hanaza vahera Anumzamo'a Fatgo vahere huno nehia naneke

¹⁵Tagra Jiu vahe mani'neta, megia vahe'mokizmi amu'nompina, kumi vahera omani'none. ¹⁶Tamagerafa huno vahe'mo'za kasegemofu erizantetira fatgo vahera omanigahaze. Hianagi Jisasi Kraisinte'ma zmentinti hazamo'za fatgo vahera nemnizankita, tagranena Jisasi Kraisinte tamentinti nehuta fatgo vahera nemnunankino, kasegema avaririzamo tazeri fatgo vahera noseankita, Jisasi Kraisinte tamentinti hanunazamo fatgo vahera nemnunanki, kasegema avaririzamo'a vahe'mota tazeri fatgo nosie. Kasegemo'a mago vahera azeri fatgo osugahie. ¹⁷Tagrama Jiu vahe'motama Kraisimpima tazeri fatgo hu

kanku'ma nehakesumota, kesunana kumi vahe mani'none hugahune. Ama'i ana zamo'a huno Kraisi higeta kumira nehumpi? Anara nosune. ¹⁸Ko'ma atre'noa kasegema eri kasefa hanu'na, nagra kumi vahe mnigahue. ¹⁹Na'ankure kasegemo'a fri kante navrentege'na, kasegefina ko fri'noanagi, menina ama kanteti Anumzanena nasimu eri'na mani'noe. Nagrira Kraisi'ene rugeka zafare nahe'za hantizage'na, Agrane ko fri'noe. ²⁰Nagra Kraisi'ene keka zafare ko fri'noankina, menima mni'noana nagra'a omani'noanki, Kraisi nagu'afina mani'negena, nagrama ama navufare'ma mani'noana, Anumzamofa Nemofonte namentinti nehu'na Agra'a avesinanteno asimua nami'nemofonte mani'noe. ²¹Nagra Anumzamofona asunku'zana namage'na hunemi'na eri amnezankna osugahue. Tagrama kasegema avaririsunkeno, Anumzamo taguvazigahie hanunkeno'a, Jisasi'ma frino tazeri agruma hu'neazamo'a amnezakna hugahie.

Kasegene Jisasinte tamentinti hanunazamofa naneke

3 ¹Tamagra neginagi Galesia vahere, Nagra Jisasima rugeka zafare ahegeno fri'nea kea ko huama hugeta antahi'nazanagi, ina ne'mo antahintahitama tamazeri savrira nehie? ²Nagra mago'za tamagripintira kena erifore hu'za hue. Tamagrama Ruotge Avamuma eri'nazana, kasegemofa erizanteti eri'nazafi, ke nentahita tamentinti nehuta eri'naze. ³Tamagra negi nenazafi? Avamumo eri agafa hu'nea eri'zana, tamagratami hanavereti erivgare'za nehazo? ⁴Nagrama nagesama antahuana tamagrama ko'ma knazama eri'nazana, amane eri'nazo? Nagrama nagesa antahuana amne knazana e'ori'naze. ⁵Anumzamo'ma Ruotge Avamu'a neramamino, kaguvazama tamagripima erifore hu'neana, Mosese kasege avaririzageno anara hu'nefi? Anumzamofa ke nentahita, Agrite tamamentinti hzageno anara hu'ne?

⁶Avontafemo'a anage hu'ne, **Abrahamu'a amentinti higeno, Anumzamo'a fatgo nere huno agrikura hu'ne.** (Jen-Agf 15:6) ⁷E'ina hu'negu antahita ketama hanazana, zamentintima haza vahe'mozage, Abrahamu mofavre mni'naze. ⁸Avontafepina anage huno krente'ne, Anumzamo'a megia vahera zmentinti hanageno z mavregahie huno hu'ne. E'ina hu'negu Anumzamo'a anage huno Abrahamuna knare musenka asmino, **maka mopafi vahe'mo'za kagripinti asomura erigahaze** huno hune. (Jen-Agf 12:3) ⁹E'ina hu'negu iza'o amentintima hanimo'a, amentinti ne'ma Abrahamuma ami'nea asomura erigahie.

¹⁰Na'ankure kasegema avaririzante Anumzamo'a muse hunantegahie hanimo'a, kausifi mani'ne. Anumzamofa avontafepina anage hu'ne, **mika vahe'mo'za mika kasegema amage'ma ontesnamo'za kausifi manigahaze hu'ne.** (Diu-Kas 27:26) ¹¹Hagi mago vahe'mo'e huno kasegema amage'ma antezampintira Anumzamofa avufina fatgo vahera

omnigahie. Na'ankure **fatgo vahera zamentintima hanagu manigahaze**. (Hava 2:4) ¹²E'inahukna hianagi, kasegemo'a amentinti hu'zana omnene, **iza'zo e'inahu hu'za kasegemofo amage'ma nentesazamo'za, ana kasegere manigahaze**. (Lev-Pri 18:5)

¹³Kasegemofo kazusifintira Kraisi'a mizaseranteno taza hu'neankino, ana kazusia Agra'a erino taza hu'ne. Na'ankure anage huno avontafepina krentene, **maka vahe'mo'za keka zafare'ma hanti'nesamo'za kazusifi mani'naze** hu'ne. (Diu-Kas 21:22, 23) ¹⁴E'ina hanunkeno Abrahamuma huhampiteneza asomumo'a, Kraisi Jisasimpinti megia vahepina nevanigeta, tagra huvempa hu'nea Avamura tamentinti hanuta erigahune.

Kasegene Anumzamo'ma huvempa hunea kemofa naneke

¹⁵Nenfugate, Nagra vahe'mo'zama maka knama nehaza zmavuzmavate hunte'na tamasamiza hue, vahe'mo'ma mago'zama hu'naku mago rimpama hu'za kema hagerafinesaza kea, mago vahe'mo'a rugea huntege, eri atrege osugahie. ¹⁶Korapara Anumzamo'a Abrahamunku'ene agripinti fore hania mofavregu huvempa kea hunte'ne. Agra kagri mofavreramine huno osu'ne. Agra rama'a mofavre raminkura osu'ne. Magoke mofavregu huno anage hu'ne, **kagripinti fore'ma hanimo'ema** hu'neana, e'i Kraisinku hu'ne. (Jen-Agf 17:7) ¹⁷Hanki Nagrama nehuana amanage nehue, esera Anumzamo'a Abrahamu'ene huvempa hutegeno, 430ti'a kafuzge evutegeno, henka kasegea efore hu'neankino, kasegemo'a Anumzamo'ma huvempama hu'nea kea eri otregahie. ¹⁸Na'ankure erisanti haregahaze hunesiazamo kasegefima manenesiana, huvempa hu'nea kefina omnesine. Hianagi Anumzamo'a Abrahamuna huvempa hunte'ne.

¹⁹E'inama hu'nesiana, na'a agafare kasegea ami'ne? Kasegema zami'neana vahe'mo'za kefozama nehazaza keama hnazegu zami'ne. Hianagi ama ana kasegema avaririzamo'a memevuno, Anumzamo huvempama hu'nea Mofavrema esia knare ome vgaregahie. E'i anazamo'a mago'ane ruzahu hu'ne. Anumzamo'a ankeru vahera kasegea zamige'za, Anumzane, vahe'mofone amuno ne' Mosese ami'naze. ²⁰Tare vahe'moke kema hagerafinaku'ma hanunkeno'a, amuno ne' mni'nenkene anara hugaragi, Anumzamo Agra'a huvempa Abrahamuna hunte'ne.

²¹Kasegemo'a Anumzamo huvempa hu'nea kene mago znarimpa osu'napi? A'o, anara osu'ne! Hagi maka kasegemo'ma kasefa tasimuma tamisiana, tagra ana kasegege amage'nenteta Anumzamofa avurera fatgo vahera manusine. ²²Hianagi Anumzamofa avontafemo'a anage hu'ne, Kumi'mo'a maka vahera kina huzmante'negu, Anumzamo'ma huvempa hu'neazama erisazana magoke kana, Jisasi Kraisinte zamentinti hanamo'za erigahaze.

²³Hianagi amentintima omenegeno, kasegemo kina rerantegeta manita neonkeno tamentinti hu'zana efore hu'ne.

Tamentinti hanuta Anumzamofu mofavre manisuna naneke

²⁴E'ina hu'negu kasegemo'a kvagiranteno Jisas Kraisi knare ehnati'neankita, tagrama tamentinti hanuta Anumzamofu avurera fatgo vahera manigahune. ²⁵Hianagi tamentinti hu'zamo fore'ma hu'nea knafi mni'nonankino, kasegemo'a kegva kriorantegahie.

²⁶Na'ankure tamagra maka'mota Jisas Kraisi'ne'ma tamentintima nehuta, Anumzamofu mofavre mani'naze. ²⁷Na'ankure tamagra maka'mota Jisas Kraisi'ne' mono tina nefreta, Kraisi'ne' kukena hiaza nehaze. ²⁸Hanki Jiu vahero Griki vahera omnita, kazokzo vahe'ene amne vahera omnita, veo aro omni'naze. Na'ankure tamagra maka'mota Kraisi Jisasimpina magoke mani'naze. ²⁹Hagi tamagrama Kraisi vahe'ma mni'nenuta, tamagra Abrahamu negehogata mni'neta, erisanti haregahazema huno Anumzamofu huvempa hunte'nea vahera manigahaze.

Kraisi erizanteti Anumzamofu mofavre maninaze hu'nea naneke

4 ¹Nagra anage hu'na nehue, nefa fenozama erisanti'ne' ne'mo'ma osi mofavrema mni'nenuno'a, maka'zana agri'za megahianagi, kazokzo eri'za vahekna huno manigahie. ²Hianagi ana mofavremo'a fenozama kegva hu'naza vahe'ene, agri'ma kegva hu'naza vahe'mofo agorga'a mni'nenigeno, nefa'ma fenozama erisanti haregahane hunte'nesia kna efore hugahie. ³Anahukna kante tagranena mofavrema mni'neta, ama mopama kegva hu'naza avamutamimofu zmagorga'a mni'neta kazokzo hu'nonane. ⁴Hianagi humante'nea kna fatgoma egeno'a, Anumzamofu Mofavre'a huntegeno, a'mo ana Mofavre kasentegno, kasegemofu agorga efore hu'ne. ⁵Ana hu'negu kasegemofu agorga mni'naza vahera, Agra mizaseranteno tamavresigeta, avreno kri'nea vahekna huta, Agri mofavre manigahune. ⁶Na'ankure tamagra mofavre'a mani'nageno, Anumzamofu Mofavre'amofu Avamu huntegeno, tagu'afi emani'ne'no tazeri otino, Aba,^a Nafa'o huno nehie. ⁷E'ina hu'negu mago'ene kazokzo eri'za vahera tamagra omani'naze. Hianagi Anumzamofu mofavre'a mni'naze. Ana hu'nazagu fenozama'a erisanti'ne' vahe mni'naze.

Poli'a Galesia vaheku hakare agesa antahi'nea naneke

⁸Tamagra korapara Anumzana keta antahita osu'neta, amne zanku, anumzantie huta nehazageno, kina reramantegeta anazamofu kazokzo vahe mni'nazane. ⁹Hianagi menina Anumzamofu keta antahita hazageno, Anumzamofu'ne'na tamagrira tamegeno antahino hu'neanki, nahigeta tamagena hunemita, haviza huno hanave'a omne avamute nehuta, mago'ane kazokzo eri'za vahe'a manisune huta nehazo?

^a 4:6 Kriki vahe kefina Aba hu'neana nenafo hu'ne.

10 Tamagra Anumzamo'ma muse huramante kazigati, mago knazupo, ikantero, kafurero, knane knanena makazana huge, osugera nehaze.

11 Tamagrikura tusi'za hu'na eri'zana eri'noankino, ana eri'zamo amnezankna huzankura nagra tusiza hu'na kore hue.

12 Nafuheta nagrama hu'noankna hutma, tamagra Jiu vahe'mokizmi kasegemofu kinafina omnihogu navenesige'na tamantahinegoe, hanage'na naganena tamagrikna hanuegu nehue. Tamagra mago hazenkea nagrira huonante'naze. 13 Hianagi tamagra antahita keta hu'naze. Navufafina kri me'nege'na, knare musenkea huama hu'na ese knazupa tamasami'noe. 14 Nagri krimo'a knaza tamagrira tami'ne, hianagi ana krima eri'noazankura tamagra tamavugosa huonantege, tamagena huonami'naze. Hianagi tamagra nagrira Anumzamofu ankeru avreankna huge, Kraisi Jisas avreankna hutma navre'naze. 15 Hianagi ana musezantamia iga menina me'ne? Nagra tamage hu'na tamagrikura huama nehue. Tamagra ana knazupa tusiza huta nazahunaku hu'nazankita, tamagrama tamavuma tagatita nazamahugama huneresina, amne anara hazasine. 16 Tamage kema neramasamuazamo, tamagri ha' vahera nemanufi? 17 Antahiho, e'i ana vahe'mo'za tamagrira masavenke hu'za tavrenaku nehazanagi, tamagrira tamaza hunakura anara nosaze. Zamagra nagriteti tamavazu hu'za zamagrarega antesageta zmaza hnazegu anara nehaze. 18 Hianagi nagrama omnisua knafine, maka zupa knare tamavutmava'ma huzanku'ma hanavematisazana, e'i knare zantfa hugahie. 19 Mofavre'nimote Anumzamofu mofavre'manita, Kraisimpina nena vahekna hutma maniho. Tamagri'ma tamaza hunaku'ma nehugenofu a'nemo mofavre kasentenaku ata negriankna nata negrie. 20 Hianagi nagra nagesa antahuana tamagrane menina umani'ne'na, fruhuna kea hu'naku nehue. Na'ankure nagra nankna hu'na tamaza hugahue, antahintahinimo'a savri hue.

Serane Hegane fronka naneke

21 Tamagra nasmiho, kasegemofu agorga'a manize nehaze vahe'mota, tamagra kasegemofu hu'nea kea ontahinazo? 22 Na'ankure anage huno avontafepina krentene, **Abrahamuna tare ne' mofavre'a mani'na'e, mago mofavrea kazokzo a'mofu mofavregi, magora kazokzo osu a'mofu ne' mofavre mani'ne.** (Jen-Agf 16:15, 21:2) 23 Hianagi kato a'mo Hega ne' mofavrema ksente'neana mopafi vahe'mo'za nehazaza huno ksente'ne, Sera'a kazokzo osu a'mo'a Anumzamo huvempa hu'nea ne' mofavre ksente'ne. 24 Ama ana a'tremokizni kemo'a Anumzamo'ma Agra'a vahe'enema hagerafino manisaza kemofo erinte'ama hu'ne. Hega'a kazokzo a'mo'a Sainai agonafima Anumzamo'ma hagerafinea kemofo hu avame huno mani'ne. Agri nagapintima fore'ma haza nagamo'za kasegemofona kazokzo naga mani'naze. 25 Hega'a Arabia kaziga Sainai

agonane, menima me'nea Jerusale rankuma hu avame huno mani'ne. Na'ankure agrane mofavre'aramine kazokzo naga mani'naze. ²⁶Hianagi anagamu monafi me'nea Jerusalea, tagri nerarera kazokzo osu a'mo hu avame huno mani'ne. ²⁷Na'ankure anage huno avontafepina krentene, *Muse huo mofavre kase onte a'moka, mofavre antezampi katama nogrimoka, ranke hunka kezatio. Na'ankure mofavrema kase onte a'moka nevema mani'nea ara agaterenka, rama'a mofavre kasentegahane.* (Ais 54:1)

²⁸Hagi nenafugata, tamagra Anumzamo Abrahamu huvempa hunte'nea mofavre Aisakinkna hutma mani'naze. ²⁹Hianagi vahe'mo'za mofavrema erifore nehaza kantetima kasema ante'nea mofavremo'a, Avamumofokantetima fore'ma hu'nea mofavre'a hazenke ami'ne. Meninena anahu avu'avazana me'ne. (Jen-Agf 21:9) ³⁰Hianagi avontafemo'a na'ane huno hu'ne? Kazokzo a'ene mofavre'anena avare atreho hu'ne. Agra mago'azana e'origahianki, kazokzo osu a'mofok ne' mofavremo maka'zana erisinti haregahie huno hu'ne. (Jen-Agf 21:10-12) ³¹E'ina hu'negu nenafugata, tagra kazokzo a'mofok mofavrea omni'nonanki, kazokzo osu a'mofok mofavre'rami mani'none.

Kraisimpina fru huta manisunazamofok naneke

5 ¹Kraisia kinafinti katufe tamente'neanki kina vahekna huta omnita, oti hanavetita nemnita, ete mago'ane kasegemofok kinafina omaniho.

²Antahiho, Nagra Poli'na amanage hu'na neramasamue, tamagra tamavufgama atresage'za tga hurmante'nesazana, Kraisia tamaza osugahie. ³Mago'ane anage nehue, maka zmufama taga hu'naza vahe'mota, maka kasegea amage'antegahaze. ⁴Tamagra Anumzamofok avurera kasegefintira fatgo vahera manigahune hutma nehaze. Kraisimpintira ko huramatre'neankita, tamagra Anumzamofok asunku'zampintira evurami'naze. ⁵Na'ankure tagra Avamumok taza higeta tamentinti nehuta, fatgo vahere huno hurantesigu amuhara nehune. ⁶Na'ankure tamavufa tga hu'nazo, tamavufa tga osunaza zana Kraisimpina amneza me'ne. Hianagi tamentinti nehunkeno anazamo tazeri otigeta, ovesinte avesinte nehuna avu'avazamok razana me'ne.

⁷Kotera knare huta tamentintifina tamaga re'nazanagi, iza ru antahintahi tamamino asevazirmantegetma tamage kema amage'ma nentazazana netraze? ⁸Hagi anama ru antahintahi tamamino asevazinermente'nea vahera, tamagima hu'nea Anumzamok huonte'nea vahe'mo nehie. ⁹Hanki osi'a zisimok, flauamofona heruntazagenok maka azeri zonere. ¹⁰Hanki tamagra Ramofok vahe mni'nazankina, nagra antahi'noe. Nagrama huankea antahinenamitma amagera nentaze. Iza'ok ana hazekema erifore'ma nehia vahe'mok ra hazenkefi manigahie. ¹¹Hianagi nafuhete, nagrama tamavufgama tga hihogukma huamama

nehanugeno'a, na'a hige'za nagrira nazeri haviza nehaze? Keka zafamofu kemo'a zmagigo zamitnafa hu havegna nehiazamo'a amanezankna hugahie. ¹²Nagri'ma navesiana e'ima hazenkema neramia nagamo'za, zamagra oku zamavufgama tga nehu'za, zmagonknazama harisazana knare hugahie.

¹³Tamagra nenafugata Anumzamo'ma tamagima hu'neana kinafintira katufeta manisazegegu kea hu'ne. Ru tamagra antahita hago kinafintira katufeta mni'none nehuta, korapa tamarimpamofu avu'ava hanagi, anara osugahaze. Tamagra ovesinte avesinte hu avu'ava zampinti oza aza hiho. ¹⁴Na'ankure maka kasegemo'a magoke kasegefi eri knare hu'ne, anagemo'a anage hu'ne, ***Tavaonkarema mani'nesamokizmia, kragagu'ma kavesintanaza hunka zmavesintegahane*** hu'ne. (Lev-Pri 19:18) ¹⁵Hianagi tamagra afi zgakafamo hiaza huta, ompri ampri hanutma tamagratami tamazeri haviza hutma fnanene hugahazanki kva hiho.

Avamumofu hanavefi mni'zamofu naneke

¹⁶Hianagi anage hu'na neramasamue, Avamu'ene kama vanoma hanazana, tamavufgamofu avesizamo'a, Avamumofu avesizanena ha'rentegeno, Avamumofu avesizamo'a avufgamofu avesizamo'a ha'renenteankino, amu'nozani'fina ha' orente arente'za me'neankinka, nazano hunaku'ma hanana zana osugahane. ¹⁸Hianagi tamagrama atresageno Avamumo'ma tamazeri fatgo huno vanigeta, tamagra kasegemofu agorga omanigahaze.

¹⁹Ama tavufgamofu avesizamo'a amanahu'za me'negeta negone. Monko avu'avazane, agru osu avu'avazane, havi avu'avazane, ²⁰havi anumzante mono huntezane, avotga zane, ha' hu'zane, fravazi'zane, knive re'zane, asi vazi'zane, vaheku agesa ontahi zane, veganokno hu'zane, vahe refko hu'zane, ²¹rumofu zanku nofi ahe'zane, ti neneno negi ne'zane, atru hu'za ruga'a savri' zamofu naneke hu'zane. E'inahukna tavutavazana eri fore nehie. Ko'ma tamasmi'noana meni mago'ene nerasmue. E'inahu zamavu'zmavama nehaza vahe'mo'za Anumzamofu kumapi omanigahaze.

²²Hianagi Avamumofu avu'avazana avesinte'zane muse'zane, rimpa fru'zane, akoheno mni'zane, vahe so'e hunte avu'ava zane, knare avu'ava hu'zane, ke amage'anteno avariri fatgo'hu avu'avazane, ²³akoheno fru avu'ava hu'zane, agra'a avesiza kegva huzamofona mago kasegemo'a hara reontegahie. ²⁴Hagi Krais Jisasimpi mani'namo'za, zamufamofu avu'avazane, zmesi'zanena rugeka zafare ahe fri'naze. ²⁵Tagrama Ruotge Avamu'enema maninesuta, atrenunkeno maka kama vano huzantifina Ruotge Avamumo kana taveri huno vanie. ²⁶Hanki atrenketa tagra tagi erira nosuta, vahera zmarimpa zmazeri otikea nosuta, kanive orente arente osanune.

Oza aza huta knaza erisuna naneke

6 ¹Nenafugta magotamimo'ma kumipima evuramisigeta, Ruotge Avamumofu nevaririsamota, ana kumapima evuramizankura tamagra'a kegva hu'netma, fru avu'avazampinti e'inahu vahera azeri fatgo hugahaze. ²Knazama oza aza hutma erinutma, Kraisi kasegea eri knare hugahaze. ³Na'ankure mago'mo'ma agima omnemenimo, nagi me'ne huno agesama antahisiana, agra'a revatga hugahie. ⁴Hianagi magoke magokemo'a agra'a eri'za rezagneno keso'e huteno, agrama e'nerisia erizankura agi'a erisaga haniazamo'a agafa'a megahie. Hanki rumoma enerisia erizantera, agra eri'zana erinteno rezagneno onkegahie. ⁵Na'ankure magoke magokemo'a agra'a eri'zamofonte knazama'a eritere hugahie.

⁶Mago'mo'ma Anumzamofu kema rempima hunezamisimofona, rempima hunezamige'za e'nerizamo'za, mika knare'zazamia refko hu'za amigahaze.

⁷Kagraka'a regavatga nehunka, Anumzamofona azeri haviza hu naneke huonto, nazano kagrama kri'nesana zana, kagraka'a kafigahane. ⁸Na'ankure vahe'mo'ma agra'a havi avu'avazama kri'nenia zana, agra'a havi avu'avazana kafigahie. Hianagi iza'o Avamumofu avesiza avaririno kri'nenimo'a, Manivava asimu erigahie. ⁹E'ina hanigu knare avu'avama hu'zankura tavesra osanie. Tagrama hanavetita erizama erisuta, nezama kafi knazupa knare ne'za kafigahune. ¹⁰E'ina hu'negu tagrama vahe'ma zmaza huga kankamuma fore'ma hanigetma, maka vahera knare tavutva hunezamita, Ramofonte'ma zamentintima nehaza nagara zamazahutfaza hugahaze.

Poli'a huv gare zmavumro zmante'nea naneke

¹¹Hanki nagrani'a nazampinti ama ranra avontamimpinti avoma krerami'noanki, tamagra keho. ¹²Zamagrama tamavufgama tga hiho hu'za tutu hunermantaza vahe'mo'za, tagra knare hu'none hu'za nehu'za, Kraisi keka zafagu'ma huama nehu'za, knazama eri'zankura zmave'nosige'za anara nehaze. ¹³Na'ankure zamagra'a zmavufama tga hu'naza vahe'mo'za, zamagra kasegea amagera nontaze. Hianagi tamagra tamavufa tga hanage'za, ana tmavufgarekura zamagra zmavufga ra hu'naku neheze. ¹⁴Hianagi nagra mago'zantere hu'na navufga erisaga osugahuanki, Rantimo Jisasi Kraisi nagriku huno rugeka zafare fri'nea zankuke navufga ra nehanugeno, Rugeka zafare'ma Kraesima eri'nea eri'zanteti ama mopafi kefo navu'nava'zamo'a ko nagripintira frigena, naganena ama mopafi avu'ava zampina ko fri'noe. ¹⁵Na'ankure avufama tga hanio, avufama tga osniana razana omnene, hianagi agu'a rukrehe huno kasefa'ma huno mani'zamo tamagezana me'ne. ¹⁶Hanki

ama trakemo ke hu'nea kante ante'za vano nehaza vahe'mofona, rimpa fru'zane, asunku'zamo'a zamagrane me'nenā, tamage Anumzamofō Israeli vahe manigahaze.

¹⁷Hanki menintetima vaniana, mago vahe'mo'e huno hazenkea onamino, na'ankure Jisasima ahazageno avufgare fore hu'neankna afuhe, nagri navufarera ana nafuhe me'ne.

¹⁸Rantimofō Jisasi Kraisi asunku'zamo'a tamagri avamu'ene mesie. Tamage.